

主編 陳智超

陳垣全集



第二十冊

安徽大學出版社

第二十冊

鮎埼亭集批注(下)

安徽大学出版社

陳垣全集



圖書在版編目(CIP)數據

陳垣全集. 第20冊, 鮑琦亭集批注. 下 / 陳垣著. —合肥:
安徽大學出版社, 2009. 8
ISBN 978-7-81110-388-5

I. 陳... II. 陳... III. ①陳垣(1880~1971)—全集
②古典詩歌—注釋—中國—清代 ③古典散文—注釋—
中國—清代 IV. C52 I214.92

中國版本圖書館 CIP 數據核字(2009)第 155424 號

陳垣全集 第二十冊 鮑琦亭集批注(下)

(清)全祖望 著 陳 垣 批注 陳智超 主編

安徽大學出版社出版發行

(合肥市肥西路3號 郵編 230039 電話 0551-5107716)

網址 www.ahupress.com.cn

合肥遠東印務有限公司印製

責任總編輯 楊應芹 彭君華

本冊編輯 鮑家全 封面設計 孟獻輝

開本 880×1230 1/32 印張 22.75 字數 443 千

2009年12月第1版 2009年12月第1次印刷

ISBN 978-7-81110-388-5

定價 1980.00 圓(全二十三冊)

如有影響閱讀的印裝質量問題,請與出版社發行部聯繫調換

資源共享
PDG

四市提（水經地理要義）地理要義（水經地理要義）卷之三（水經地理要義）仙水金鑑（水經地理要義）卷之三
 今社作部元慶墓誌（水經地理要義）元鮑瑋（水經地理要義）考集
 十九郭甚睦寔石志（水經地理要義）則館（水經地理要義）年已元鮑瑋
 亭集未刻本特不敢著錄耳

陳垣全集之三十

鮚埼亭集批注(下)

安徽大學出版社

鮎埼亭集批注 外編卷十一

行狀三

明故都督張公行狀

都督張公諱廷綬，字雲衢，浙之寧波府鄞縣人也。曾祖某，祖某，父某。都督少時喜讀兵法，時天下多事，益思以功名自見。又善挽強弓，舞大刀，兼喜壬選之術，故其補諸生也，在武學中。

錢忠介公起兵，以驍勇署總統，會於越中，方議所立，聞台州已有監國，遣都督迎奉，從之江上。時台州之起兵者陳公函輝，及義兵諸營，分汛江上。而陳公以會推留中調度，其兵莫屬。陳公訪於錢公曰：「麾下將材乎？」錢公曰：「前日以迎奉來者，其人可使也。」陳公奏授都督僉事，統所部還鎮台之海門。江上諸營束手不思有所經畫，但爭分地，爭分餉，日無寧晷，海門稍遠得不預。然台軍遙受陳公節度，而都督爲錢公將，幸兩家皆忠悃無

嫌忌。都督時時以餘餉饗錢軍，或曰幸無若田弘正〔一〕之結怨於鎮人也。而都督未嘗有所強取於軍，故陳公聞而彌善之。

〔一〕田弘正，舊唐一四一，新一四八。

浙東八府，方氏之軍最橫，王氏次之〔二〕。兩家老營，一在嚴陵，一在寧波，居民爲之罷困。其以客軍駐台者，爲谷文元，宗室常接、李礎，暴橫頗學兩家。而竭力支柱籠絡，使不至大逞者，都督之力爲多。

〔二〕方國安、王之仁。

已而閩中大將李公唐禧至，監國以其宿將，使共治軍於台。唐禧故金山衛官，起兵不克，入閩，由閩入浙。都督讓之，凡署銜列座，必使居己上。而唐禧自以客將，每事皆咨都督而行。兩人和衷共濟，日練兵以輸江上。大兵入台，唐禧謂都督曰：「公當俟陳公消息，然兵已逼，不如偕我早死，徒殺士卒無爲也。」都督曰：「諾。」各遣其麾下，袍笏兀坐營門。大兵過都督營，諭降，不屈，殺之。唐禧亦被殺。而都督眷屬之從軍者，皆死無一存。嗚

呼！乙酉而後，吾浙東諸公，蓋亦厓山三丞相之流，如都督者，則蘇劉義一輩人物也。

先曾王父兄弟在江上，嘗爲方國安部將所恨，幾致不測，都督救之得免。故先贈公嘗欲爲都督作傳，而未就也。高兵部雪交亭集載其名，未詳其事。今已百年，杞、宋之文獻，日不足徵。而都督家門已絕，莫可搜索。恐遂無知者，聊據所聞以述之，使因國之史有參考焉。謹狀。

明兵科都給事中前知慈溪縣江都王公事略〔一〕

王公諱玉藻，字螺山，南直隸揚州府江都縣人也。司勳郎納諫之子，崇禎癸未進士，釋褐知浙之慈谿縣事。子良和平，民不擾而事集。未期年，北都亡，殉難翰林檢討汪公偉，前慈令也。公帥官吏士民哭臨畢，哭臨，謂哭崇禎也。爲位哭之三日。已而故少詹項煜〔二〕以從逆亡命來，慈之馮公元颺〔三〕與公皆出其門，馮氏匿之夾田橋之別業；公雖致之餼，顧甚菲。及慈之義民不容，撲而淹之橋下，公不問。明人最重閭誼，或以公爲過。公曰：「吾不能爲向雄之待鍾會哉〔四〕？顧懼負前日大臨一哭耳。夫君臣之與師友果孰重？」聞者聳然。

〔一〕王玉藻，類徵隱逸二。

〔二〕項煜，號水心，吳縣人，見北略廿二從逆諸臣。

〔三〕馮元颺，外集五有闕銘。

〔四〕向雄，晉書四八；鍾會，魏志二八。

乙酉夏，大江以南盡附。浙中百城守令，或棄官去，否則降。而公與沈公宸荃起兵，晉御史，仍知縣事。公募義勇，請赴江上自効，乃解縣事，以兵科都給事中往軍前。公任事邁往，壯氣勃勃，而江上諸帥惡之，先不予以餉。公曰：「是將剗刃於我也。」乃力請還朝。其在垣中，雅持正議，又不爲諸臣所喜，乃力求罷，莊太常元辰留之。

丙戌〔一〕夏，浙東再破，公黃冠行遯於剡溪，不肯歸。久而資糧俱盡，慈民及浙東之義士時時周之，妻收遺棄，子拾墮樵，不以爲苦。壯心至老不衰，每臨流讀所作詩，激厲慷慨，仰天起舞。

〔一〕順三。

庚寅〔二〕，先大父嘗訪之，相與語島上事。公曰：「今日當猶在靖康、建炎之際耳，君以

祥興擬之，下矣。」蓋其崛起如此。辛卯〔二〕以後，始歸故鄉，卒以窮死。

〔一〕順七。

〔二〕順八。

嗚呼！明末吾鄉多賢吏，而其後以死報國者九人：前寧波府推官則儀部黃公端伯、駕部林公之蕃，知鄞縣則尚書沈公猶龍、侍郎張公伯鯨、御史王公章，知慈溪縣則巡道陳公璣、檢討汪公偉，知奉化縣則給事胡公夢泰。其以乙酉受鄞縣之命，不久即去，卒死國者，駕部王公之枾，即王公章子。而公以首陽之節參之，其耿耿之心未嘗於諸公有媿也。乃文獻淪胥，問之揚人，無知公者；問之寧人，亦無知公者。悲夫！

前此寧之父老，其於王、汪二公蓋嘗爲之祀，今亦廢矣。予思於寧之湖上築祠，合祀黃公以下，而以公終焉。是亦扶忠義以勸長吏之一助也，乃序公之事而表之。

李杲堂先生軼事狀〔一〕

梨洲黃公所作杲堂先生墓誌〔二〕，於其大節卓行，略有表見，而事不備。去今七十年，知者鮮矣。先生仲孫世法以爲未慊，予少得之先大父贈公〔三〕所述者，蓋稍足具十之三四，

乃詮次而復之。

〔一〕李鄴嗣，續甬詩五三。

〔二〕文約一、續文案四、文定前集七。

〔三〕全吾騏。

先生以戊子〔一〕正月預於「五君子」之禍，甫得脫，而尊人儀部公〔二〕之喪自杭歸。殯畢，是年七月再下府獄，蓋夫己氏〔三〕餘患未已也。聞者以爲必死，而先生在囚中，其所居即華公嘿農、楊公楚石〔四〕故地，方作招魂之詞以酹之。已而終得不死。自先生蒙難後，蓬藿滿三徑，又時時善病，或疑其壯心已盡，不知其逐日焦原，左執太行之獲，右搏雕虎〔五〕，蓋如故也。而不大聲色，以泯其相。

〔一〕順五。

〔二〕李櫚，卷五有阡表。

〔三〕謝三賓。

〔四〕華夏、楊文琦。

〔五〕「焦原」三句，見後漢書八十九張衡傳思玄賦注引尸子，又文選十五思玄賦注引。

庚寅〔一〕，馮侍郎躋仲〔二〕之難，其監軍爲姚江黃宗炎，刑有日矣。時傾家救之〔三〕者爲馮公子道濟〔四〕，奔走其間者爲董農部次公，天鑑〔五〕，卒成其事者爲萬農部履安〔六〕，而先生之力亞於道濟，遂出之劍甞之中。

〔一〕順七。

〔二〕馮京第，續甬詩十二。

〔三〕黃宗炎。

〔四〕馮愷愈，元廳子，慈溪人。

〔五〕次公，董守諭，續甬詩二十及廿三皆作「戶部」，「農部」誤。天鑑，董德偁。

〔六〕萬泰。

癸巳〔一〕，黃岡萬僉事允康〔二〕來吾鄉，及別去，先生餞之。座客爲僉事筮易，得「睽之三：見輿曳，其牛掣，其人天〔三〕且劓」。皆大駭。先生因固請僉事且潛身甬上，僉事不可。行至吳中，楊崑之變作〔四〕，先生終身痛之。

〔一〕順十。

〔二〕萬若吉，續甬詩卅二，並附楊崑事。

〔三〕天，髡刑。

〔四〕楊崑，以滇中勅存問舊臣，被獲。

甲辰〔一〕，南屏之難，大帥搜得其所與中土薦紳往還筆札〔二〕，欲按籍殺之。先生以奇計使中止，其所保護尤多。其餘蓋不能以畢傳。嘗有客以故宮什器求售者，先生一見其題識，流涕洟瀾，不能自勝，其人亦泫然而去。燕人梁職方公狄〔三〕嘗曰：「鄴嗣將無使勾甬一片地盡化為碧血蒼燐，大是可畏。」

〔一〕康三。

〔二〕張煌言，居南田被逮，前集九，參外集廿五張尚書集序。

〔三〕梁以樟。

康熙戊午〔一〕，浙之大吏皆欲以先生應詞科之薦，以死力辭。已而萬徵君季野亦有史館之招，先生送之，歎曰：「嗟乎！鄭次都能招鄧君章同隱弋陽山中，不能禁其喟然而別〔二〕。從此出處之事，且有操之者。」徵君以是終不受館職，幕府以重幣乞先生課其子，爲

詩謝遣之。

〔一〕戊午，康十七。按恒例，此「康熙」應在「甲辰」上。

〔二〕鄭敬，見後漢鄧曄傳。鄧曄，後漢五九。「其」謂鄧曄。

以予竊窺先生之才甚長，故能側身憂患之中，九死不死。其所以不死者，蓋欲留身有待，而卒不克。故其詩曰：「采薇磴磴，是爲末節；臣靡猶在〔一〕，復興夏室。」是則先生之志也。所圖莫遂，故垂死而喟然以不得從「五君子」爲恨，是非先生之志也。然則此九死不死者，已足扶九鼎之一絲矣。嘗謂先生一身流離國難，則宋之謝翱、鄭思肖；委蛇家禍，則晉之王裒、唐之甄逢〔二〕；周旋忠義之間，則漢之云敞、閻子直〔三〕。前此先生遺文未敢盡出，或有弗能知其詳者，今世法既悉表而出之，讀其書得其行矣。

〔一〕靡，少康臣。左襄四及夏本紀索隱、正義。

〔二〕王裒，晉八八；甄逢，舊一八七下，新一九四。

〔三〕云敞，前漢六十七；閻子直，後漢七一第五種傳。

先生私淑蕺山之學於梨洲，私淑漳浦之學於大滌山人何義兆、呂漢憲〔一〕，顧終身未嘗開講，然其忠孝自持，則所謂真學者，其人也。

〔一〕何瑞圖、呂叔倫，見前集卷卅三大滌山房祠石齋先生議。

錢塾庵徵君述〔一〕

六世祖免，進士，以侍郎管江西布政司使。

〔一〕錢光緒，續甬詩五十。

五世祖瓚，進士，廣西按察司副使〔一〕。

〔一〕曾祖鳳午，封禮部主事。

祖若賡，進士，江西臨江府知府。
父敬忠，進士，直隸寧國府知府。